

Här President,

de Coronavirus huet zanter 4 Méint eist Land am Grëff, eist Liewen verännert, an virun allem huet en Wonnen geschloen, an Wonnen hannerlooss. An nach ëmmer mécht en daat. Wonnen nët nëmmen am medizinesche Sënn, mee och am gesellschaftleche, soziale, ekonoméschen an amdemokratéschen Sënn.

Och wann mer et hei zu Lëtzebuerg faerdeg bruecht hunn, d'Déidlechkeet vum Virus a Grenzen ze halen, esou woar dee Wee dohinner e ganz batteren an d'Kolloateralschied woaren a sinn enorm.

De Begrëff vun der **Corona-generatioun** mécht d'Ronn an gemengt ass domadder eng ganz Generatioun vu jonken Mënschen, denen hiir Perspektiven alles aanescht wéi roseg sinn. e betrëfft natiirlech virum allem déi jonk Mënschen, mee nët nëmmen, ën ëmfaasst och all déi, déi sëch an der Kriis vergiess empfonnt hunn.

Här President,

an dëser Kriis ass ët vill Méi gaangen ewéi ëm d'Bekämpfen vun engem Virus. Et woar e Stresstest fir eis Regiirung, eis Gesellschaft an fir déi Art a Weis, wéi mer hei zesummeliewen.

A mer kéinten och Saachen feststellen, nämléch daat waat gudd geklappt huet an daat waat nët gudd geklappt huet an daer Kriis. Mer kiinten feststellen, wéi ‚resilient‘ ass Gesellschaft ass, a wou mer schwaach sinn., a wou mer dréngend nobesseren mussen, Saachen fundamental evränneren oder a Fro stellen. Alles daat huet de Premier awer nët gemeet, mee en huet eis hei en Erlebnisbericht ofgeliwwert iwuer wéi dichteg d'Regiirung dach woar, wann Saachen gudd geklappt hunn, a zum deem waat nët geklappt huet, huet hien entweder näischt gesoot oder awer d'Schold bei anere gesicht.

Här President,

ëch wëll mat der sanitärer Situatioun ufänken:

Mär hate Chance, dass eisen öffentleche Gesondheetssystem nach eigenermossen intakt ass, wëll d'Austeritéitspolitik an de Geescht vum New Public Management déi een am Spidolsplang vun 2018, mee och an den Debatten ronderem de Virage ambulatoire erëmfënnt, nach net esou op d'Spëtzt gedriwwe gi sinn, dass de ganze Butték abrécht, wann et akkut gött. Jo effektiv, Situatiounen an de Spideeler déi d'Limite vun der Mënschwüerd iwwerschreiden, wéi a Frankräich oder Italien, konnten hei verhënnert ginn.

Mir hatten och Chance, dass keent vun eisen 3 Nopeschlänner, aus deenen den Gros vun eise Gesondheetspersonal op Lëtzebuerg schaffe kommen, insistéiert huet, déi Leit ze requisitionnéieren, fir se bei sech anzesetzen wou d'Situatiounen deelweis eskaléiert ass.

Eng grouss Fragilitéit vun eise Gesondheetssystem ass d'Ofhängegkeet vun auslänneschem Gesondheetspersonal. Ech soen dat net, well an där doter Konfiguratioun, eise Gesondheetssystem kollabéiert wir, wann dës majoritär auslännesch Aarbechtskraft net méi hätt kéinten op Lëtzebuerg schaffe kommen.

An et ass un der Regierung, sech deem an Zukunft unzehuelen an endlech déi Ausbildungsméiglechkeeten am medezinnesche Beräich ze bidden, déi mer brauchen fir neit Personal kënnen an Zukunft hei am Land ze rekrutéieren. Dat géing och bedeuten, dass d'Gesondheitsberuffer sozial a finanziell mussen opgewäert ginn.

Här President,

ët gött awer eiser Meinung no, eng grouss Léier aus dëser sanitärer Kriis zéie muss: mer daerfen nët méi eise ganze Gesondheetssystem esou eroffueren wéi daat an dëser Kriis geschitt ass. Dokteren berichten, datt den Zoustand vun hire Patienten sëch zum Deel däitlëch verschlechtert huet. Graad bei den eelere a vulnerabele Leit, also dene, déi mer jo eigentlëch schütze wollten. D'Spideeler hunn

deelweis enorm Retard'en kritt mat einfachen Agrëff, Retard'en, déi nach Mélint a Méint waert daueren opzeschaffen.

Dobäi kouw nach, dass d'Kommunikatioun vun der Regierung de Leit d'Gefill konnt ginn, si kéinte net bei den Dokter oder an d'Urgence mat hirem Problem, well et géing momentan Schlëmmeres ginn a gläichzäiteg haten d'Leit d'Angscht virun enger Ustiechung, well dee Risiko gouf och oft genuch kommunizéiert an ass och effektiv nach ëmmer do.

D'Leit hu sech also net méi getraut bei den Dokter ze goen, obwuel se eventuell nach hätte kéinten ee Rendez-vous kréien, bei dem een oder aneren Spezialist a beim Hausdokter. Dass dat Konsequenzen wärt hunn, ass zimmlech evident.

Opzeschaffen graad vun deem Gesondheetspersonal an de Spideeler, waat an denen leschte Wochen a Méint iwuer hiir Grenzen hu misse goen, déi eigentlech physesch a psychesch schons un der Limitt, graad si misse lo alles daat ophuelen, waat duerch d'Kriis verluecht ginn ass.

An der Däiwel: wann mer am September eng 2. Well kriiten, da misse erem déi, déi schon op Felg dréinen nach eng Kéier de Kapp hiirhalen. Daat ass déi gréissten Gefoër vun enger 2. Well, an de wierkléche strukturelle Problem vun daer Logik, datt Spideeler esou käschten-effizient schaffen mussen.

Eis fehlt ët nët u Material zu Lëtzebuerg (Beotmungsgeräter, Intensivbetter, etc.) Eis fehlt ët u Leit, well joerzentelang nët a Leit investéiert gouf, an d'Santé jhust als ze minimiséieren Käschtfaktor gesinn gouf. Hei brauchen mer ganz dréngend e Paradigmewiessel.

Här President,

Mir hate Chance, dass mer mat der Cargolux eng strategesch Muechtpositioun konnte verteidegen am internationale Réngen fir un dat néidegt Gesondheets- a Schutzmaterial ze kommen.

Lëtzebuerg am Géigesatz zu Däitschland an och Frankräich huet keng industriell Aktivitéiten déi spezifesch op d'Hirstellung vu Medikamenter an medezinnesche Geräter ausgeriicht sinn. Mir produzéieren weder Impfstoffer nach Masken, oder Otemgereeter. Mir bidde vläit steirlech Virdeeler fir d'Domiciliéierung vun der Pharmaindustrie, mee dat ass alles.

Mir sinn also och hei am pharmazeutesche Beräich ofhängeg vun eisen europäesche Partnerlänner an déi sinn erëm ofhängeg vun eenzelene Produktiounen déi ganz iwwe déi europäesch Grenzen eweg ausgelagert goufen, well europäesch Wirtschaftspolitik oblige. Iwwer 80% vun den aktiven Substanzen vun de Medikamenter, déi an Europa verschafft ginn, kommen aus China, Indien an den USA.

Och daat ass eng wichteg Léier aus der Kriis.

Här President ,

An der sanitärer Kris, huet d'Kooperatioun tëscht europäesche Memberstaaten de facto net existéiert. D'Groussregioun als Groupement européen de coopération territoriale, ass nach wie vor am Dornröschenschlof. An zouen Grenzen, ënnert denen d'Leit hei am Land gelidden hunn, sinn och e Resultat vum Refus aus de leschten 7 Joër, Motor vun enger grenziwwerschreidender Politik.

Här President,

Och am Beräich vum universellen Zougang zu der Fleeg huet eise Gesondheetssystem seng Faillen. Och scho viru Corona sinn eng ganz Rei Leit hei am Land duerch dat sanitärt Netz gefall, déi entweder ouni Doheem, ouni Pabeieren, ouni Revenu, oder Précaire Beschäftegter sinn.

Des Vergiessen vum Sozialversicherungssystem goufen während der Pandemie nach emol gréissere gesondheetleche Risiken ausgesat. A fir déi gött haut och nach ëmmer keng Léisung a Form vun enger Couverture Médicale Universelle.

Ouni Organisatiounen wéi Médecins du Monde wier d'Gesondheet vun der Leit an der Sécurité Sociale sech selwer an dem Zoufall iwwerloos. Dës Leit gëlle quasi net als Deel vun der Populatioun déi an d'large scale Covid Tester soll agebonne ginn. Si kréie keng Invitatioun fir den Test, well se keng Adress hunn. Si kënnen sech net teste lossen well se keng Matricule hunn an net bei der Sécurité Sociale ugemellt sinn.

Dir gesitt et sinn net nëmme Leit aus verschiddene sanitäre Mesuren ausgeschloss ginn, mee si sinn och aus der offizieller Kommunikatioun an de Krisemesuren vun der Regierung ausgeschloss ginn, och an der Deconfinementsphas. Ech kommen dono nach emol dorop ze schwätzen.

Här President,

Et muss hei jidderengem bewosst sinn, dass mer grad elo kënnen decidéieren de Wee vun der Privatiséierung an der Moart-orientéierung vun eisem Gesundheitssystem no manageriale Kritären, **net** wiederzagoen. Als Lénk setze mir eis fir den Ausbau vun der Sécurité Sociale, der Erweiterung vun der Offer u Soins an dem generellen Accès zu gesondheetlechen Services an, bis hinnen zu enger universeller Gesundheitsversicherung.

Här President,

Dës sanitär Kris huet net nëmme eisem Gesundheitssystem erprouft, mee all Einzelnen ass op seng Resilienz - seng Fähegkeeten mam Virus a mat de restriktive Mesuren während dem Confinement ëmzagoen, op Prouf gestallt ginn.

D'Resultat dovun ass eng Verschlechterung vun der mentaler Gesundheit vun der Populatioun. Corona hannerléist seng Spueren an der Geschicht als kollektiven Trauma.

De Premierminister huet gëschter Zuele genannt, iwwer d'santé mentale vun de Leit nom état de crise sanitaire. Besonnech déi jonk wiere betraff. Aus dem Sondage geet erfir :

- dass Depressiounen an Angschtzustänn zu Lëtzebuerg mat am heefegste virkomm sinn, no Italien a Spuenien.
- An deenen 3 Länner hunn d'Leit sech an den éischte Wochen vum Confinement extrem gestresst gefillt. An, an Italien a Lëtzebuerg hu sech d'Leit och am Meeschten alléng gefillt.

Här President,

Et kënnst also eppes op eis duer, eng gréisser Détresse mentale ënnert de Leit fir déi eist Land net déi néideg Infrastrukturen, Ulafstellen an och net dat néidegt medezinnesch Personal bitt.

Der klammender Demande u psychologescher a psychiatrescher Betreuung koom och scho virun Corona kee méi no. An et ass eng Schan, dass hei zu Lëtzebuerg d'Konsultatiounen an der Psychologie an an der Psychotherapie nach ëmmer net rembourséiert ginn.

Här President,

Spéitstens säit dem Bestseller vum franséischen Ekonom Thomas Piketty wësse mir dass d'Ongläichheeten säit Jorzéngten an de westleche Länner eropginn.

Oft gouf an de leschte Méint gesot, dass d'Covid-Pandemie dës Ongläicheeten méi grouss mécht. Domat ass wuel gemengt, dass se méi däitlech a méi siichtbar ginn duerch des Kris, wëll se wieren och ouni Covid weider eropgaangen.

Déi Ausso ass ganz richtig, mir gesinn et elo schonns. Eischt Zuele vum Aarbechtsmaart bestätegen se, sozial Organisatiounen schloen Alarm a wann d'Informatiounspolitik vum Familljeministère vum Corinne Cahen och nëmmen e besser méi transparent wir wéi déi vum

Kreml, wéisste mer wahrscheinlech, dass och an de Sozialbüroen op de Gemenge ëmmer méi Leit em Hëllef froen. De LISER mécht jo och eng Etüd, déi eis da weider Opschloss liwwere wäert.

Ier ech elo e bëssen an den Detail ginn, wéilt ech nach soen, dass een duerch Covid méi e kloere Bléck op d'Ongläichheeten huet. Wëll nieft dem finanziellen Aspekt vu Revenu'en a Patrimoine, gëtt de Bléck och méi däitlech op déi ongläich Liewenschancen. An déi ginn duerch Covid nach vill méi ongläich.

Liewenschancen, op Franséisch géif ee *Champs des possibles* soen, domatter mengen ech eng gutt Kandheet a Schoulzäit, eng Ausbildung oder e Studium dat ee sech erausgesicht huet a wat ee vläit och passionéiert. Eng Aarbecht fannen, déi en anstännegt Liewen erméiglecht a Sécherheet bitt an de verschiddene Liewenslagen. E Logement wat de Bedürfnisser entsprécht, vläit d'Grënnung vun enger Famill.

Natirlech och eng Rent, déi en Alter an Dignitéit erméiglecht an Infrastruktur, déi een um Enn vum Liewen, wann de Kierper oder de Geescht net méi mécht wat ee wëll, opfänkt. All des Puzzlestécker, déi e Liewen liewenswäert maachen, si leider an eiser Gesellschaft keng Rechter, nee. Mir müssen awer grad elo oppassen, dass se net zu Privilegien vun ëmmer manner Leit ginn.

Wann een also e Bilan mécht, lo schonns oder a puer Méint, wa mer nach méi kloer gesinn, wat d'Konsequenze sinn vun der Wirtschaftskris, da muss d'Regierung och doru gemoss ginn, also der Fro ob et gelongen ass oder genuch gemaach ginn ass, fir ze verhënneren dass genee dat geschitt.

Här President,

De *Champs des possibles* ass fir verschidde Leit ganz kleng a Covid huet dat däitlech gemaach. Dat sinn d'Leit op der Strooss. Ech menge keen ass a war sou schlecht drun wéi si. Kee Logement fir sech ze confinéieren, keng Krankeversécherung deelweis, fir sech

behandelen ze loossen, keng Kreditkaart fir ze bezuelen, kee Buedzëmmer fir sech d'Hänn ze wäschen, keng Passanten op der Strooss, déi hinnen e puer Su ginn.

Wat huet d'Regierung gemaach fir hinnen ze hëllefen? Näischt. Zu London huet d'Gemeng iwver Méint fir all des Leit eng Ënnerkonft gesicht fir se all vun der Strooss erfzekeréien...am liberalen England. D'Hoteler, déi do dofir réquisitionnéiert goufen, stoungen och hei eidel. Dat wär Solidaritéit gewiecht. Bis haut ass déi Situatioun onverännert. Hu si Zougank zu Schutzmaterial, kenne si d'gestes barrières? Kënne si sech teste loossen a wa se positiv sinn, wéi kréie se e Resultat a wou fënnt hir Quarantaine statt? Do muss onbedéngt nogebessert ginn, egal ob eng zweet Well kënnt oder net.

De Premierminister huet gëschter *bedauert*, dass eeler Leit an Alters- oder Fleegeheemer sozial immens isoléiert waren. Déi Leit si vulnérabel an se musse geschützt ginn, do si mer eis eens. Mee och hei wär et méiglech gewiecht, d'Situatioun ze verbessern, andeem de Familljeministère méi kloer a verbindlech Aussoen a Richtung Gestionnaire ginn hätt.

Dann hätt zumindest kéinte verhënnert ginn, dass iwverall aner Regele gezielt hätten an et deelweis zu Abus'en komm ass, wou Leit op hiren Zëmmeren de facto agespaart an iwver Méint ofgeschnidde ware vun der Außewelt. Och do muss fir d'Zukunft dofir gesuergt ginn, dass sou Ausuferunge verhënnert ginn.

De Chômage gouf vum Premierminister ugeschwat. Dat ass sécherlech eng sozial an ekonomesch Situatioun, déi den Horizont fir ganz vill Leit méi kleng mécht. Mee och hei lount et sech d'Lëns wäit opzemaachen.

Scho viru Covid waren iwver 15.000 Leit am Chômage, deelweis scho laang. Déi verléiere lo all Hoffnung op eng Plaz a rëtschen no an no aus dem Chômage an de Revis, wëll d'Covid-Mesuren auslafen wat de

Chômage ugeet. Vill Leit schaffen hallel a liewen domat ënnert der Aarmutsgrenz. Och si fanne lo näischt Zousätzlech.

Mam Chômage partiel konnten zwar vill Aarbechtsplaze gehale ginn, a Leit mat klenge Paien kruten 100% als Chômage ausbezuelt, mee trotzdem ass vill Revenu fir d'Stéid ausgefall, besonnesch am HORECA-Secteur, wou d'Personal och vun Drénkgeld leeft.

Dass elo ëmmer méi Leit Sozialhëllef froen (Caritasd), och fir d'éischte Kéier am Liewen, weist, dass do Existenzen um Spill stinn. Hannert all dene Leit läit ganz oft och de grouse Schiet vun der Logementskris, déi fir vill Leit mat Prêt a Loyer elo knallhaart gräifbar gëtt.

Dass d'Gewerkschafte bei der Tripartite net isoléiert iwwer de Chômage schwätze wollten ass fir eis dowéinst och evident. Dat kann een net anescht, wëll dee Problem jo net an zwee Méint verschwonnen ass. Falls en dann eng Kéier verschwënnt, huet e bis dohinner enorme soziale Schued gemaach, den net eleng iwwer d'Aarbecht ze behiewen ass. Do muss een sech elo dergéint stemmen.

Virun engem Mount bei der klenger Chômage-Debatt hat ech vun der Covid-Generatioun geschwat, wéi bekannt gouf, dass 1 vu 4 Jonken am Chômage ass. Wann ech virdu vu Liewenschance geschwat hunn, déi riskéieren ze verpuffen, da sinn et déi Jonk, fir déi et besonnesch zoutrëfft.

De Sprong an e Studium ass schwier. A wéi enger Stad fënnt een am oder just nom Shutdown eng Wunnéng? De Sprong an eng Ausbildung ass net manner evident, och mat méi staatlecher Ënnerstëtzung fir Betriber déi ausbilden. De Sprong an eng Aarbecht ass den Ament fir déi meescht eng Saach vun der Onméiglechkeet.

De Problem dobäi ass: Berufssufänger hu nach keng Rechter erschafft, kréien also kee Chômage. Se sinn am Prinzip och ze jonk fir

de Revis. Se stinn also do mat näischt a müssen hoffen nach doheem kënnen ze wunnen.

Mir riskéiere lo Zoustänn ze kréien, wéi mer se kennen aus Dokumentatiounen aus Griicheland oder Spuenien während der Finanzkris, wou eng ganz Generatioun déi bescht Joren vun hirem Liewen doheem bei den Elteren hu misste verbréngen, mat ofgeschlossener Uni oder Ausbildung.

Här President,

Eis ass bewosst, dass dat keng einfach Aufgabe ass. Et kann een dee Problem net einfach mat engem Streech léisen, fir jiddereen dat richtegt fannen. Mir mengen awer, dass et elo d'Zäit ass fir et mol ze probéieren:

- Aarbechtsplaze musse geschützt ginn. Betriber, déi elo weider Gewënner maachen dierfen kee Personal entloossen (Beispill LuxGuard)
- De Chômage partiel muss bis 2,5x de Mindestloun zu 100% de Loun ersetzen, net just 1x de Mindestloun. Bei de Logementspräisser kann e Stod mat 5000€ Revenu net einfach mol op 1000€ verzichten.
- D'Rechter op Chômagegeld müssen zäitlech verlängert ginn op 24 Méint fir ze verhënneren, dass Leit ouni Aarbecht no an no am Revis landen.
- De Revis muss eropgesat ginn bis op d'Aarmutgrenz, also ronn 2000€.
- De Mindestloun mus em 10% erhéijt ginn. (all déi grad genannte Mesuren stäerken d'Kafkraft vun de Leit a kommen der reprise ze gutt, mee se verhënneren och, dass ëmmer méi Leit Sozialhëllef ufroe müssen)
- D'Garantie Jeunesse muss elo e Recht ginn, net just eng gutt Absicht. Dat heescht dass all Jonken no 4 Méint eng Aarbecht oder eng Formatioun muss kréien, déi och bezuelt ass. Wann de

Privatmarché dat net hirgëtt, da musse Staat a Gemengen aktiv ginn. Dat kascht Suen, jo, mee et ass eng Investitioun an d'Zukunft, a jonk Leit, déi Ënnerstützung erfuere géifen an enger schwéierer Zäit. Se wäerten der Gesellschaft et erëmginn iwwer Jorzéngten.

Här President,

Mir mengen, datt an dëser sanitärer Kriis vill Leit sech Froe gestallt hunn an op d'Konklusioun kommen, datt "e Wieder-Esou" net méi drobar ass. Déi al Uerdnung ass bewisenermoossen onfäheg, déi sozial an ökologesch Erausforderunge vun eiser Zäit ze meeschten. Mir brauchen e fundamentale Wiessel an der Aart a Weis, wéi mer eis Wirtschaft an eis Geselleschaften organiséieren.

Wa mer dann awer d'Regierungsaktioun kucken, da schéngt et eis evident, datt se just schnellsméiglech erëm an déi al Routine zrëck wëll a keng politesch Konsequenzen aus der Situatioun gezunn huet.

Sie setzt bei der Relance eenzeg an alleng op Staatshëllef fir grouss Betriiber, anstatt endlech d'Kafkraaft vun de Leit ze stäerken an annulléiert och nach d'Steiererliichterungen fir déi schaffend Leit. D'Majoritéit votéiert hei während dem Confinement de CETA-Accord, sie hält dru fest, datt de Rentefong a knachteg Multinationalen investéiert a viru kuerzem gouf erëm e Gesetz verabschied, datt de Multinationalen a Superräicher bei der Steieroptiméierung hëlleft. Op der anerer Säit hu mer méttlerweil hei an der Chamber Gesetzesprojeten am Militärberäich leien, déi mam Ganzen 1,1 Milliarden Euro kaschten<sup>1</sup> !

Dat ass e bal krampfhaft Festhalten un alen Denkmustere, déi eis net méi weider bréngen. Déi méttlerweil 40 Joer al Ideologie vum Neoliberalismus huet naischt méi am 21e Jorhonnert verluer.

---

<sup>1</sup> WSA (225mio), MRTT (598mio), Satellite (350mio)

Wëlle mer wierklech weider fueren mat der hemmungsloser Ausbeutung vun der Natur an den Arbechter op der ganzer Welt, oder wëlle mer dat mat staarke Reegelen endlech ënnerbannen?

Wëlle mer wierklech weider fueren, d'öffentlech Servisser ofzebauen an drop an derwidder ze liberaliséieren an ze privatiséieren, oder solle mer net au contraire déi öffentlech Servisser nees am Intérêt vun der Allgemengheet stärken?

Wëlle mer weiderhinn ënnert der Fuchtel stoen vun de Kasino-Finanzmäert? A wëlle mer weiderhinn eng international Handelsuerdnung opbauen, déi eenzeg an alleng op déi grouss Multinationale zougeschnidden ass?

Wëlle mer weider fueren déi grouss Sociétésiten an Ultraräicher mat Steiercadeauen ze iwwerschëdden, während de groussen Deel vun der Bevëlkerung ënnert der Spuerpolitik leide muss an d'Inegalitéiten ëmmer méi zouhuelen? Oder wëlle mer net endlech fir Steiergerechtegkeet suergen, wou jidferen säi faire Beitrag leescht?

Jo, mir si nach ëmmer matzen drann an der sanitärer Kriis a mir verstinn, datt ee net zu dësem Zäitpunkt scho ka nei politesch Orientatioune präsentéieren. Mä et gëtt awer Zäit, datt d'Regierung endlech Signaler vu sech gëtt, datt se eppes aus dëser Kriis geléiert huet.

Ech mengen, datt een och muss ophalen de Leit Angscht ze maachen, wat eis Budgetssituatioun ubelaangt. Wann d'Regierung déi ganzen Zäit vun 7, 8 oder 10 Milliarde schwätzt, déi de Staat mobiliséiert huet, da stinn de Leit jo d'Hoer zu Bierg a se hunn Angscht ëm d'Zukunft vum Land.

Jo, de Staat huet temporär Liquiditéitsengpäss déi mussen iwwerbréckt ginn, mä deen allergréissten Deel vun deem, wat elo do un Zomme genannt gëtt, fléisst jo rëm zrëck an d'Staatskees. Dat ass de Fall fir all déi Reporten, déi d'Entreprise a Saache Steierzuelungen a Cotisatiounen accordéiert kruten oder fir d'Aides remboursables. Déi Montanten vun de Staatsgarantien wäerte gréisstendeels nie gezu ginn a souguer bei dem Chômage partiel fléisst jo rëm een Deel als Steieren erëm zrëck.

Och musse Verschiddener heibanne mol ophalen Panik ze verbreedden, wéinst der Verscholdung. Och do maachen d'Leit sech iwwerdriwwe Suergen an dat ass jo och normal, well d'Veerscholdung elo 10 Joer laang als Déiwelswierk dohinner gestallt ginn ass. Wat schlussendlech zielt, ass net de Pourcentage um PIB, mä den Undeel vun den Zënszuelungen un de globalen Dépensen. An dat Verhältniss ass och mat 30% Verscholdung nach méi wéi komfortabel. Keng Scholden ophuelen a nokucken, wéi d'Kriis eis Wirtschaft an eis sozial Systemer zerstéiert, dat géif eis ëm e Villfaches méi déier ginn.

Donieft ass et och kee Naturgesetz, datt déi kleng Leit mussen duerno d'Lächer stopfen. Et gi vill aner Sourcen, wou de Staat sech ka nei Suen siche goen an déi Fro - wien da muss bezuelen a wien geschount gëtt - wäert dann zu deem Zäitpunkt den Objet vun de politescher Ausernanersetzung sinn. Bei där

Ausernanersetzung wäerte mir als Lénk ganz gutt oppassen an ech hoffen, datt déi normal Biergerinnen a Bierger hei am Land sech dobäi net rëm alles gefale loossen.

Lëtzebuerg ass finanziell besser opgestallt wéi praktesch all Land an Europa. Et soll ee natierlech elo net ausginn ouni ze zielen - zemools well mer jo net wësse wat do nach alles op eis duerkënnt - mä et soll een op alle Fall ophalen de Leit Angscht ze maachen.